

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI SAIFUDDIN NASUTION  
BIN ISMAIL [ KULIM BANDAR BAHARU ]**

**TARIKH : 11 NOVEMBER 2020 (RABU)**

**SOALAN**

Minta **PERDANA MENTERI** menyatakan kerugian semasa PETRONAS punca dan strategi mengatasinya.

**JAWAPAN**

**YB DATO' SRI MUSTAPA BIN MOHAMED,  
MENTERI DI JABATAN PERDANA MENTERI (EKONOMI)**

**Tuan Yang di-Pertua,**

1. Sebagaimana Ahli Yang Berhormat sedia maklum, Kumpulan PETRONAS mencatatkan kerugian selepas cukai (LAT) sebanyak RM21 bilion pada suku kedua berakhir 30 Jun 2020 berbanding keuntungan selepas cukai (PAT) RM14.7 bilion dalam tempoh sama pada tahun 2019.
2. Kerugian ini disebabkan oleh pendapatan yang rendah dan rosot nilai terhadap aset yang ketara berikutan penurunan harga minyak ekoran permintaan lemah akibat penularan wabak COVID-19 dan keadaan lebih bekalan dalam pasaran. Pada suku kedua 2020, harga minyak mentah Brent terus jatuh ke paras purata sekitar AS\$29.20 setong berbanding AS\$68.83 setong pada suku kedua 2019.
3. Pada separuh pertama tahun ini, industri minyak dan gas global berdepan cabaran besar akibat permintaan lemah dan lambakan bekalan yang disifatkan sebagai "*Great Reset*". Keadaan ini telah memberi implikasi yang negatif kepada harga minyak dunia serta kedudukan kewangan kebanyakan syarikat minyak dan gas utama dunia termasuk PETRONAS.
4. Keadaan pasaran yang mencabar dan tidak menentu ini dijangka akan berterusan sehingga separuh kedua 2020. Unjuran yang dibuat oleh Rystad Energy pada bulan April 2020 menjangkakan syarikat minyak dan gas global akan kehilangan pendapatan sebanyak AS\$1 trilion pada tahun ini berikutan keadaan pasaran semasa.
5. Dalam hal ini, sebagai syarikat minyak dan gas negara, PETRONAS terus komited dengan usaha untuk mempertahankan aliran pendapatan dan mengoptimumkan kos bagi mengimbangi kesan negatif situasi harga minyak rendah terhadap keuntungannya dan pada masa yang sama menjaga kepentingan strategik negara.

6. Untuk strategi tempoh jangka masa panjang, PETRONAS akan terus fokus dalam melaksanakan strategi pertumbuhan serampang tiga mata atau *three-pronged strategy* iaitu:

- (i) memaksimumkan penjanaan tunai;
- (ii) memperluas perniagaan teras dan menggiatkan usaha mengekalkan organisasi dalam mengharungi perubahan; dan
- (iii) memastikan kemampuan jangka panjang syarikat melalui penglibatan di dalam peluang perniagaan baharu.

7. PETRONAS juga akan terus meninjau peluang dan portfolio perniagaan baharu bagi memantapkan lagi daya tahannya dalam berdepan persekitaran pasaran global yang amat mencabar terutamanya di dalam tenaga boleh baharu seperti solar dan tenaga angin.

8. Di samping itu, Kerajaan melalui Unit Perancang Ekonomi, Jabatan Perdana Menteri akan melaksanakan Kajian Dasar Tenaga Negara atau *National Energy Policy* (NEP) bertujuan untuk menentukan dasar dan arah tuju strategik jangka masa panjang bagi sektor tenaga negara. Kajian ini antara lain akan menyentuh cabaran-cabaran di dalam sektor tenaga termasuk bagi industri minyak dan gas. Hasil kajian ini akan mengenalpasti peluang pertumbuhan baharu dengan mengambil kira trend peralihan tenaga serta cabaran trilemma tenaga (*energy trilemma*) yang menekankan keseimbangan dasar bagi mencapai jaminan, kemampuan dan kelestarian bekalan tenaga. Kajian NEP ini dijangka akan dilancarkan pada suku pertama tahun 2021.

Sekian, terima kasih.